



明生員傅先生山傳

提督學政嵇曾筠撰

傅先生名山字青主一字公他陽曲人祖霖官山東
遼海叅議父之謨明經授徒號離垢先生山生而穎
異讀書十行并下過目輒能成誦年十四督學文太
青拔入庠繼文者袁臨侯先生繼咸也一見深器之
准食餼檄取讀書三立書院時時以道學相期許山
益發憤下帷袁每云山文誠佳恨未脫山林氣耳崇
禎丙子繼咸爲直指張孫振誣詆下獄山徒步走千

里外伏闕訟寃孫振怒大索山山敝衣藍縷轉徙自
匿百折不回繼咸寃得白當是時山義聲聞天下後
繼咸官南方數召山山終不往 國朝定鼎自九江
執繼咸北上山乃潛入都密候繼咸起居繼咸見殺
山收其遺藁而歸山性至孝父之謨病篤朝夕稽顙
於神願以身代旬日父愈人謂孝通神明不異黔婁
云執親喪哀毀特甚苦塊米飲不茹蔬果友愛諸季
先人遺產弟蕩費強半終身無怨色弟歿撫遺孤過

於己子失偶時年二十七子眉甫五齡旁無妾媵誓
不復娶於里黨姻戚竭力賙其緩急爲人分別有讓
恭儉下人與人言依於忠孝謀事要於誠實蓋其敦
厚藝倫根本自然非有強也自李自成犯京師明莊
烈皇帝殉國山遂絕意進取棄青衿爲黃冠號石道
人擇衣草履時遨遊於平定祁汾間所至有墨痕筆
跡工詩賦善古文詞臨池得二王神理該博古今典
籍百家諸子靡不淹貫大叩大鳴小叩小鳴復自託

繪事寫意曲盡其妙精岐黃術邃於脉理而時通以
儒義不拘拘於叔和丹溪之言踵門求醫者戶常滿
貴賤一視之家故饒至是漸益寔安貧樂道泊如也
屋舍田園多爲細人竊據概置不問康熙戊午 詔
舉博學宏詞廷臣交章薦山山堅以老病辭當事者
立迫就道道稱股病不能行肩輿入都臥旅邸不
赴試滿漢王公九卿賢士大夫下逮馬醫夏畦市井
細民莫不重山行義就見者羅溢其門子眉送迎常

不及山但欹倚榻上言衰老不能爲禮諸貴人益以
此重山弗之怪也明年三月吏部驗病入告奉 旨
傳山文學素著念其年邁特授內閣中書着地方官
存問遂得放歸歸愈澹泊自甘僻居遠邨不入城府
然欽其名者益眾率紆道往見冀得一見爲榮又六
年卒遠近會葬者數千百人山所著有性史十三經
字區周易偶釋周禮音辨條春秋人名韻地名韻兩
漢人名韻等書

嵇禮齋曰昔者嘗怪先生值堯舜之世篤志高尚懇
辭徵辟何其果也及讀漢史見周黨王霸之爲人初
不辱於新莽健武復辟連徵不起乃知士各有志先
生蓋有道而隱者也彼誠見夫有明末季上下交征
利卒滅亡於寇盜之手固已心寄夫長林豐草矣甯
復以青紫爲榮耶至若義白知己之冤其賢於世之
平居師友相親慕臨難背負不一引手掾漠然若不
相識者亦遠矣古云民生於三事之如一惟其所在

則致死焉先生真無愧哉

贊曰於惟先生得聖之清訟冤奔訃蒙難不驚辭榮
却聘先民是程功在名教百世景行

鐵城寄傅青主

附札二首
附錄霜紅龕集

宜春袁繼咸

袁山

獨子同憂患于今乃別離乾坤留古道生死見心知
貫械還餘草傳燈不以詩悠悠千載業努力慰相思
江州求死不得只今只得爲其從容者聞黃冠入
山養母甚善此時不可一步口口也有詩一冊付

曲沃錫珽屬致門下藏之山中矣可到未乙酉冬季

前詩到未若未到門下不可往取可屬西河曹孝

廉緩頰取之必藏之門下所目今著經觀史觀二

書經觀簿就矣史觀尚未竟不知能終竟此業否

晉士惟門下知我甚深不遠蓋棺斷不敢負門下

知之使異日羞稱袁繼咸爲友生也

丙寅初秋

徵君傳山傳

附錄池北偶談

濟南王士禎貽上著

徵君傳山字青主一字公佗太原府人母夢老比邱

而生生復不啼一瞽僧至門云旣來何必不啼乃啼
六歲食黃精不樂穀食強之乃復食讀十三經諸子
史如宿通者崇正十年袁臨侯繼賢督學山西爲巡
按御史張孫振誣劾被逮山藁館左右伏闕上書白
其冤諭德馬君常世奇作山右二義士傳謂山與汾陽薛宗周
比之裴瑜魏劭亂後夢天帝賜黃冠納衣遂爲道

士裝醫術入神有司以醫見則見不然不見也康熙
戊午徵聘至京師以老病辭己未與范陽杜樾俱

授內閣中書舍人歸里山工八分隸及金石篆刻畫
入逸品子眉字壽髦亦工畫作古賦數十篇常鬻藥
四方兒子共輓車暮抵逆旅輒篝燈課讀經史騷賦
選諸書詰旦成誦乃行否卽與杖

序

執成方而治病古今之大患也昔人云用古方治今
病如拆舊屋蓋新房不經大匠之手經營如何得宜
誠哉是言昔張仲景先生作傷寒論立一百一十三
方言後世必有執其方以誤人者甚矣成方之不可
執也然則今之女科一書何爲而刻乎此書爲傳青
主徵君手著其居心與仲景同而立方與仲景異何
言之仲景傷寒論雜症也有五運六氣之殊有中表

傳裏之異或太陽太陰不一其稟或內傷外感不一其原或陽極似陰陰極似陽不一其狀非精心辨症因病製方斷不能易危就安應手卽愈此書則不然其方專爲女科而設其症則爲婦女所同帶下血崩調經種子以及胎前產後人雖有虛實寒熱之分而方則極平易精詳之至故用之當時而後傳之後世而無不效非若傷寒雜病必待臨症詳審化裁通變始無詒悞也嘗慨後世方書汗牛充棟然或偏攻偏

補專於一家主熱主寒堅執謬論炫一己之才華失
古人之精奧仲景而後求其貫徹靈素能收十全之
效者不數數覩讀徵君此書談症不落古人窠臼製
方不失古人準繩用藥純和無一峻品辨症詳明一
目了然病重者十劑奏功病淺者數服立愈較仲景
之傷寒論方雖不同而濟世之功則一也此書晉省
鈔本甚夥然多秘而不傳間有減去藥味錯亂分量
者彼此參證多不相符茲不揣冒昧詳較而重刊之

竊願家置一編過症翻檢照方煎服必能立沉疴並
並登壽域或亦濟人利世之一端也夫

道光十一年新正上元同里後學祁爾誠謹序

序

世傳先生字不如詩詩不如畫畫不如醫醫不如人
先生之高遠固不可以區區之醫見也而先生有所
著性史十三經字區周易偶釋周禮音辨條春秋人
名韻地名韻兩漢人名韻等書不概見於世雖欲言
先生之高莫之由也今讀先生之傳想先生之爲人
豈非所謂天子不得臣諸侯不得友者歟先生有女
科傳於世平嘗遵治家人婦女無一不效嘗語人曰

先生女科神乎神矣惜未有男科傳焉或謂子不聞
諺乎能治十男子不治一婦人婦科難男科易故有
傳有不傳耳似也而心疑之癸亥秋有邦定羅公持
先生男科小兒科以相示平見而奇之究其所從來

羅曰道光初年余家刻印先生女科是時平定州孫
毓芝先生爲余家西席由平定州攜至舍下余錄之
藏笥已四十餘年矣今有鄉人生產胞衣不下求方
於余余搜女科而得此因子好女科而特爲相示平